

galea, cum cornu vel cratera, & plurima tenementa cum calcari, cum strigili, cum arcu, & nonnulla cum sarragi.

In *Blackwater* finum, quem Borealem hujus Centuriæ latus claudere dixi, & optimis ostreis scatet, quæ *VVallfleot* vocamus, confluent duo flumina quæ magnam agri partem alluunt, *Chelmer* & *Froshwell*. *Chelmer* fl. ex interiori regione, quæ sylvis vestita effluens decurrit primum per *Thaxsted* mercatorium oppidulum in colle perquam amœne situm, & *Tilney*, ubi cœnobium Mauritius filius *Gilberti* olim posuit, ad *Estannes*, ad *Turrim* nunc *Eston*, quam incoluerunt Domini de *Lovanio* dicti, utique Godfredo fratre Henrici ejus nominis Sexti Brabantia Ducis prognati, qui huc missi ad *Honorem de Eya conservandum*, ad sextam usque progeniem Barones habitati sunt. Sed sub Edwardo Tertio deficiente prole mascula, per filiam hæreditas & dignitas ad Guilielmum *Bourghier* demigravit, cujus posterii brevi Comites fuerunt *Essexiæ*. Inde *Dunmow*, quod olim *Dunmawg*, in libro Angliæ censuali *Dunmaw* dictum, oppidum situ peramœno in colle modice prono prolabitur. Ubi Iuga quædam Monasterium Anno M C XI fundavit. Sed *Guilielmus Bainardus*, de quo Iuga tenebat, (sic scribitur in privata Monasterii illius historia) villam de Parva *Dunmow*, per feloniam amisit Baroniam suam, & Rex *Henricus Primus* illam Roberto filio *Richardi filii Gisleberti Comitis de Clare*, & heredibus suis cum *Honore Castri Barnardi Londini* dedit. Qui *Robertus tunc fuit Dapifer Regis Henrici*. Hæc ipsissima sunt authoris verba, nec mihi fas existimo ea interpolare, quamvis in illis sit *Αντιγονισμός*, qui in optimis historicis aliquando occurrit. Nondum enim ex illa familia fuit Comes de *Clare*.

Nunc paulum utrinque à flumine paulisper digrediamur. Hinc haud procul *Plaisy* sedet, Gallice sic dicta à placendo, quondam *Espre*, quæ Constabulariorum Angliæ ultimis Saxonum annis, & postea (ut liber *Eliensis* testatur) habitatio. Ad quam duo magnæ autoritatis principes, *Thomas de VVoodstock* Dux *Glocestriæ*, Comesque *Essexiæ*, & *Ioannes Holand* Comes *Huntingdoniæ*, Regis *Richardi Secundi* frater uterinus, qui de honore Ducis *Exoniæ* deturbatus, cum inter abruptam contumaciam, & deforme obsequium modum tenere non potuerint, fata complerunt. Ille enim ob præcipitem contumaciam hinc inopinato Caletum abreptus & suffocatus: hic ab *Henrico IV*, ob seditionem hoc ipso loco securi percussus, ut ipsius *Woostochii* manibus pœnas dedisse videatur, cujus exitii author habebatur. Inde *Chelmer* non longe à *Leez* defluit cœnobio quondam à *Gernonis* condito, quod hodie sedes Baronum *Riche*; qui *Richardo Rich* viro prudentissimo Angliæ Cancellario sub Rege *Edwardo Sexto* hanc dignitatem acceptam ferunt. Pauloque inferius sedet *Hatfeld Peuerell* à possessore suo *Ranulpho * Peperello* sic dicta, qui in uxorem habuit illa ætate forma supra omnes venusta filiam *Ingelrici* viri inter Saxones prænobilis, quæ Collegium hic posuit, quod nunc quasi dirutum, & in fenestra ecclesiæ, cujus pars tantula adhuc superest, tumulatum jacet. Hæc marito peperit *Guilielmum Peuerell* Castellanus *Doveriæ*, *Paganum Peuerell* Dominum de *Brun* in

Barones
Rich. Hat-
field Pe-
uerell,
alias Pe-
perking.
Liber S.
Martini
London.

Comitatu *Cantabrigiæ*, & Regi *Guilielmo Conquæstori*, cujus erat pellex, *Guilielmum Peuerell* *Nottinghamiæ* Dominum. Sed ad *Chelmerum* redeamus, qui jam *Chelmerfore*, vulgo *Chensford* petit (ubi ex distantia à *CAMALODVNO* antiquum *CANONIVM* fuisse videatur.) Hoc satis amplum est oppidum in ipso quasi Comitatus medio inter duo flumina quæ concordibus aquis se hic conjungunt intersitum, *Chelmerum* ab Ortu, & aliud ab Austro, cui si nomen *Can* (ut aliqui volunt) *CANONIVM* fuisse non est cur dubitemus. Patrum memoria monasterio à *Malcolmo* Rege *Scotorum* constructo fuit celebre, nunc tantum *Assis*, (sic vocant fora in quibus causæ totius agri bis quotannis coram Iudicibus ventilantur) insigne. Res florere vero incœpit, cum *Mauritius Episcopus Londinensis*, ad quem spectavit, pontes hic construxerit regnante *Henrico Primo*, viamque deflexerit, quæ antea per *Writtle* amplitudine suæ parochiæ notissimum duxit, quod Rex *Henricus Tertius* Roberto *Brus* Domino *Anandiæ* in *Scotia*, cujus uxor ex hæredibus erat *Ioannis ultimi Cestriæ* Comitis, cum noluerit *Cestriæ* Comitatum inter colos muliebres distrahi, concessit: *Edwardusque Secundus* *Humfredo de Bobun* Comiti *Herefordiæ* & *Essexiæ*, cum *Brusii* posterii à fide defecissent, donavit. Nuperrime autem cum *Iacobus* Rex primis regni auspiciis honorem Baronum pluribus impertiret, *Ioannem Petre* Equitem clarissimum Baronem *Petre de Writtle* creavit. Cui pater erat *Guilielmus Petre* vir perfectæ prudentiæ & exquisitæ doctrinæ, non tam memorandus ob munera quæ in Republica obivit amplissima, utique qui *R. Henrico Octavo*, *Edwardo Sexto*, *Mariæ*, & *Elizabethæ* à sacris fuit consiliis, & sæpius ad externos Principes Legatus; quam quod bonis studiis innutritus de bonis literis in *Academia Oxoniensi* bene, & de egenis vicinis apud *Engerston* pie meruerit.

Froshwell fl. qui verius *Pant*, & demum *Blackwater* dictus, fonte exili prope *Radwinter*, quod fuit Baronum *Cobham*, emissus, cum longo decursu nihil viderit præter *Bocking* sacerdotium opimum, *Cogshall* à *Stephano* Rege *Cluniacensibus* positum, & *Hwittam* ab *Edwardo Seniore* rege D C C C X I I I ædificatam, quæ etiam *Eustachii* Comitis *Boloniensis*, (ut ferunt) *Honor* erat; *Chelmerum* obvium habet, qui solidus haud procul à *Danbury* in colle satis edito, quæ diu habitatio fuit insignis familiæ *Darciorum*, delatus, *Woodham-Walters* præterfluit, vetustam *Dominorum Fitz-VValters* sedem, quorum altissima cum antiquitate, conjuncta fuit nobilitas; à *Roberto* filio juniori *Rich. filii Gisleberti Comitis* repetita, sed superiori sæculo in *Ratclifforum* stirpem per filiam translata, qui ad *Comitem Suffexiæ* dignitatem proveci *New hall* ædes magnificas parum hinc distitas jam incolunt. Hæc olim ad *Butleros* *Ormondia* Comites spectarunt, deinde ad *Thomam Bollen* Comitem *Wiltoniæ*, à quo permutatione facta Rex *Henricus VIII* accepit, maximis impensis adauxit, novoque nomine *Beau-Lieu* appellavit, quod nunquam tamen apud populum invaluit.

Deinde *Chelmer* aliis confluentibus aquis insula *Camalodunum* amnica

Chens-
ford.
CANO-
NIVM.

Writtle,
olim Espre.

Wood-
ham-Wal-
ters.
Barones
Fitz-Wal-
ters.
Newhall.
Lelandus
in Cygne-
am Can-
tionem.

Camalo-
dunum.